

伊濱集



詳校官庶吉士臣初喬齡

侍讀臣孫球覆勘



膳錄監生臣任溥

欽定四庫全書

伊濱集卷四

元 王沂 撰

七言古詩

陽春曲

楊花濛濛海波白十里香風飄紫陌
流蘇寶幃金陸離漢家帝子朝天歸
蒲萄重錦新勅賜蓬萊宮中綠衣使
道傍縮首觀且避蹀躞玉鞭光照地
大隄綠樹啼嬌鴉知是平陽公主家
回首畫橋芳草暮蝴蝶不隨春色去

楊花宛轉曲

妾乘碧油車郎乘青絲騎相逢狹斜道楊柳著花未遲
遲度紺幘稍稍逐蘭珮宛轉結深情歲華含密意游絲
絆得陽春暉乳燕銜將何處歸翡翠輕裾承不著寶環
纖手捧還飛合歡金縷結未已馬啼聲斷鳴珂里鳴珂
芳草綠離離楊花依舊逐游絲游絲掛在空虛裏莫道
春心無所似

杜翁八十歲

陽曲杜翁八十年雙瞳點漆眉紫烟鹿皮裁裘鳩刻杖
見者疑是商山仙問翁康強何以然年未五十嗜欲捐
養生有道不鍊鉛安心有法不坐禪清時壽域開無邊
承家有子才且賢諸孫亦復相後先斑衣竹馬來翩翩
長軒奧室羅芳鮮自適其適全其天更知守一歲且千
此語不信莊生傳

題竹溪

山家有田不種玉長林橫陳萬修竹紅塵千丈定不到

秀色一川差可掬山人獨立清若鵠時聽溪流響琴筑
豈無摩詰畫輞川亦有昌黎序盤谷林泉真樂自有餘
塵世虛名顧何足他年拄杖我敲門煮笋堆盤釀新熟

送蕭性淵縣尉

蕭郎本是將家子部曲當年散如水錦囊故物有焦尾
蕭也與之共生死北上彈琴峽中道寫出流泉言語好
龍沙萬里躍馬歸青袍風吹白于草江頭鴈落春蕪碧
小試腰間大鳴鏑酒酣夢著塞垣事雪擁穹廬深一尺

只今人物方渺然英豪誰識郭通泉袖中正有霜鐘摻
天上應傳寶劍篇

題郭熙山水

不知造化初此山誰開坼峯隱羣山深路盤兩岸窄始
信郭熙手力與造化敵巒溪淋漓潘谷墨妙處不減營
邱筆愁雲慘澹萬里凝陰壑闌干千丈冰杖筇荷擔者
誰子袖擁兩耳如寒蠅雪深芒屨迹易滅前溪渡頭鳥
飛絕人生胡為不自逸歲晚崎嶇行作客剡曲拏舟興

盡還灞橋騎驢肩聳山書生骨相例寒餓留得虛名傳
世間

襄城道中偶雪

黃雲壓野撥不開天寒日暮胡為來我前雪片大如手
我後槁木鳴相挨地爐圍處燒榾柮灰中笑指蹲鴟熟
田家自有老瓦盆不管北風寒刮骨金狔覆鞍雪不濕
三尺角弓鳴霹靂歸來馬上懸雙狼不管冰髭珠的皦
人生適意雖不同鵬鷃逍遙天地中不似襄城城下雪

一段清愁愁殺客

苦雪吟

東風獵獵奪花魄
陵轢陽和強飛雪
過時舞態自婆娑
入夜寒聲轉清絕
模糊物象偶爾同
炫晃晨昏才一瞥
饑鶯失肉坐欲癡
驚犬穿籬吠如噎
君不見酒闌歌斷
五侯家春光融融面
生纈瓦溝急霰珠走盤
海犀鎮幃風不揭
又不見擁門三尺
袁安宅破壁虛窓飛
亂屑
稽灰紅明復滅
僵卧渾忘衾似鐵

題溪山風雨圖

今年西遊出寶鷄羣峰迎人高復低秦山森列古環玦
渭水摩蕩青玻瓈前林慘淡風雨急元氣淋漓收不得
淙流浩浩懸縞素山澗層層失紅碧回瞻縹緲烟霧中
飛樓曉榭如爭雄若非祈年橐泉觀定是五柞長楊宮
猙獰掣蓋嗟行旅苔磴欹滑畏如鼠欲將筆力狀奇絕
只恐山靈驚妙語歸來京洛厭風塵開卷洒然醒我神
澄懷寂聽追所歷竟欲濯纓溪水津南朝君臣歌玉樹

畫工筆諫昏莫悟江風掇屋醉不知珍重山人詠漁父
為施淳民題臨本郭熙山水歌

崇寧一片郭熙山淪落人間感流轉毫分隱顯別清妍
千疊峰巒坐中見葱籠雲樹只重重世間春風幾度逢
怪石常存犇壑勢幽泉微露出山蹤緣奇挹勝茅亭小
亭下清江自縈繞諸峰斬絕出陂陀天矯蒼松立塵表
百尺絲綸一釣舟石闌斜對路悠悠山色自多朝暮趣
江流不盡古今愁郭家名筆誰摹寫鄒氏山房絕瀟灑

臨流點綴入精微意態神情豈其亞施君之筆良足稱
畫樓粉壁時相親長歌一曲丹青引莫道今人愧古人

送陳舜咨

北風吹雪山欲奔擁裘坐馬愁鳶蹲觸寒歷險來特特
杯酒談笑回春溫我方學道畏壘北晏坐已入不二門
築垣昔曾聽山鬼灑筆今解憎王孫丈夫事業抗浮雲
紛華剝落真實存長松老矣更添節甘井汲多終不渾
恨君不識謫仙人恨我不識岑徵君鳴皋山前一相見

詩愁又滿梅花村

雪後遊陸渾山宿鳴臯寺感事

窮山作吏聊隨世為愛伊濱可人意
田間野水弄明滅木末晚山橫紫翠
陸渾坡口天下稀閬州城南之所愧
折葦風生鴈雙起平沙雪淨鳬翁睡
我本江湖釣竿手漁子蘆人不須避
紫芝眉宇無復見持正文章誰得記
生前偶落山林牢身後不同金石碎
山川難得人更難勝槩名流今兩致
千載那知我亦來登高不墮羊公淚

身似轉蓬安稅駕事如嚼蠟都忘味長疑安石恐不免
何似孫郎遂初志日暮招提陳薄飯夜闌禪榻成良寐
不將妙語記曾遊只恐山靈厭人至

戲詠南山土風

羣山奔騰南相望萬馬同秣爭低昂危途中盤杏一髮
俯視欲作寒蠅僵澗流初疑蒼兕吼烟起忽作青蛟翔
峽空僅容孤鶴度川衍或可千人藏桃源之山隔塵世
菊潭之泉多壽康茅茨日暮照空翠竹牖天寒搖水光

驅驢木杪販麻客挾矢林間圍獵郎地爐堆獸爇石炭
瓦鼎號蚓烹芸桑村醪未溫和鹿血餅餌半熟分熊肪
登高放目不可制長劍耿耿倚大荒大荒物皆得所託
我胡為乎獨遑遑膠膠擾擾浪自苦物外日月來不忙
伊靈丐我一片石他年刻此囚山章

大風

東君染花滿春國飛廉妬春奪花魄黃塵瀟瀟暗白日
天為花愁救不得大川揚波水柱立羣鴉驚呼半空黑